

四庫全書

集部

欽定四庫全書

粵西文載卷十九

桂林府通判汪森編

記山川

新開石巖記

唐鄭叔齊

城之西北維有山曰獨秀宋顏延之嘗守茲郡賦詩云  
未若獨秀者峨峨郛邑間嘉名之得蓋肇於此不藉不  
倚不騫不崩臨百雉而峙立扶重霄而直上仙挹石髓

結而為膏神鑿嵌竇呀而為室囂浮可遠幽偏自新勝  
概岑寂人無知者大厯中御史中丞隴西公保障南服  
三年政成乃考宣尼廟於山下設東西庠以居胄子備  
俎豆儀以親釋菜雖峻陟可尋而叢薄未剪公乃日常  
從以上每指荒榛而授事為力無幾得茲穴焉閤而外  
廉隘以傍達立則良其背行則躡其腓於是申謀左右  
朋進畚鍤壤之可跳者布以增徑石之可轉者積而就  
階景未移表則致虛生白矣豈非天賦其質智詳其用

乎何暑往寒襲前人之略也譬猶士君子韜迹獨居懿  
文游藝不遇知己發明則蓬蒿向晦畢命淪悟鹽車無  
所申其駿和氏不得成其寶矣篆刻非寵庶貽後賢建  
中元年八月廿八日記

柳州山水近治可遊者記

柳宗元

古之州治在潯水南山石間今徙在水北直平四十里  
南北東西皆水匯北有雙山夾道嶄然曰背石山有支  
川東流入於潯水潯水因是北而東盡大壁下其壁曰

龍壁其下多秀石可硯南絕水有山無麓廣百尋高五丈下上若一曰甌山山之南皆大山多奇又南且西曰駕鶴山壯聳環立古州治負焉有泉在坎下常盈而不流南有山正方而崇類屏者曰屏山其西曰四姥山皆獨立不倚北流潯水瀨下又西曰仙奕之山山之西可上其上有穴穴有屏有室有宇其宇下有流石或形如肺肝如茄房或積於下如人如禽如器物甚衆東西九十尺南北少半東登入小穴常有四尺則廓然甚大竅

中黑燭之高僅見其宇皆流石怪狀由屏南室中入小  
穴倍常而上始黑已而大明為上室由上室而上有穴  
北出之乃臨大野飛鳥皆視其背其始登者得石秤於  
上黑肌而赤脉十有八道可奕故以名其山多櫟多櫨  
多簣簣之竹多橐吾其鳥多種歸其南有石魚之山全  
石無大草木山小而高其形如立魚在多種歸西有穴  
類仙奕入其穴東出其西北靈泉在東趾下有麓環之  
泉大類數雷鳴西奔二十尺有洄在石澗因伏無所見

多緣青之魚及石鯽多儵雷山兩崖皆東西雷水出焉  
蓄崖中曰雷塘能出雲氣作雷雨變見有光年旱禱用俎  
魚豆彘修形糝糝酒陰虔則應在立魚南其間多美山  
無名而深峨山在野中無麓峨水出焉東流入於潯水

新開隱山記

吳武陵

入則維化出則寧物物寧而後志適乃有西垌之賞始  
一日命騎西出出門里餘得小山山下得伏流顧曰石  
秀水清蔥蔥乎其韜怪物邪乃釋騎蹈履北上四十餘

步得石門左右劒立矍然若神物持之自石門西行十步得北洞坦平如室室內清縹若繪積乳旁溜凝如壯士上負橫石奮怒若活乘高西上有石窓櫺窓下望千山如指自石室東迴三步得石嵒嵒下有水泓然疑虬螭之所宅水色墨綠其濬三丈載舟千石舟可坐數十人羅絲竹歌舞飄然若乘仙嵒之南壁有石磴可列樂工十六人具束若畎澮貫石流去不知所止北壁半穴如懸門徹外容小舟出門有潭袤三十步潭有芰荷潭



北十步得溪溪橫五里徑二百步可以走方舟可以汎  
畫鷁渺然有江海趣魚龍澆瀾鷗鷺如叅自溪潭之間  
有地丈餘其色正赤歷石門東南越小嶺石林危嶠夾  
聳左右自嶺下十步得東嵒自嵒口直下二十步有水  
濶三尺許淺沙若畫細草如織南望有結乳如薰籠其  
白擁雪自嵒西南上陟飛梯四十級有碧石盆二乳竇  
滴下可以酌飲又梯九級得白石盆盆色如玉盆間有  
水無源香甜自然可以飲十人不竭還自石盆東北上

又陟飛梯十二級得石堂足坐二十人乳穗駢垂擊之  
鏗然金玉聲堂間有石方如碁局即界之以奕儵然不  
知柯之爛矣自堂北出四步直西二筵南入小峽得內  
洞東有石室如畫頂上方井弱翠輕綠便如藻繡自洞  
南下仰矚東崖有凝乳如樓如閣如人形如獸狀閭然  
不知造物之所變化也自樓閣斗下七步次石渠渠深  
七十尺渠上為梁曲折繚繞三百步遠日月所不能燭  
矣左右列炬而後敢進自梁直南抵絕壁斗下為飛梯

飛梯九盤而後及水水北涯有石閣峭甚綴以欄檻適可宴息水通魚船東出朝陽四隅黝黑方谷如鑿以石下投波聲響山寒氣薄人往往畏恐自石閣還上絕壁西去十步又得小洞俯行三十步左右壁有鍾乳或垂或滴其極有石室正如禪庵多白蝙蝠出小洞北上二十步又得外洞石色猶四洞東西壁下有石數十枚其面砥平間有凹罇琴薦厥狀甚怪游人列坐肅若水霰其東有便房桁櫨拱枕支撐環合猶鬼工之椎琢也洞

北七步臨西石門石門西去三十九步得西洞洞深九十尺北崖有道可容一軌崖南有水水容若鏡纖鱗微甲悉可數識東過小石門門東頰行三十步詰屈幽邃道絕窮崖又寬明置水閣崖下閣勝九人閣下水濶三十尺伏流崖南亦達朝陽自西洞口南去一矢得南洞洞西壁可譙數十人其東有水輕風徐來微波蕩漾琴高遇之當不返矣北上山頂盤曲五百步石狀如牛如馬如熊如羆劔者鼓者笙竽者塤箎者不可名狀石路

四周而松蘿萃於西北公曰茲山之始與天地並而無能知者揭於人寰淪夫翳薈又將與天地終豈不以其內妍而外朴邪君子所以進夫心達也吾又舍去是竟不得知於人矣乃伐棘導泉目山曰隱山泉曰蒙泉溪曰蒙溪潭曰金龜洞曰北牖曰朝陽曰南華曰夕陽曰雲戶曰白蝙蝠嘉蓮生曰嘉蓮白雀來曰白雀石渠寒深若蟠蛟蜃特曰蛟渠或取其方或因其瑞幾焯於圖謀也於是節稍廩儲羨積度材育工為亭於山頂不采

不獲倏然而成憑軒四望目極千里高禽鵩獸蛟翔蟻  
走恍然令人心欲狂又作亭於北牖之北夾溪潭之間  
軒然鵬飛矯若虹據左右翼為厨為廊為歌臺為舞榭  
環植竹樹負脫囂滓邦人士女咸取宴適或景晴氣和  
蕭然獨往聽詞於其下嗟乎我俗既同我風既調茲亭  
茲山又與人物共之則不知古之甘棠其類是邪他日  
會新亭之下辱命紀事奉筆遽題於北牕曰成紀公字  
濬之不名重也內吾為伊周外吾為方召疏山發隱也

決泉啓蒙也作亭子來也三者其異乎四賢之志乎不異也故書

隱山六洞記

韋宗卿

天作南北星斗辨之地分方夏山川間之其土殊其鎮異故磅礴博厚隱嶙鬱律連崗走峰千里一息秦之山也發地干霄上為嶢嶢攢空交映積為崇嶺越之山也桂林郡郭千崑競秀世情賤目俗態無心故茲山接城郭之間億萬斯年石不能言人未稱焉寶厯紀元給事

中隴西李公以直諫匡主圖贊國政時未及秦人安得  
寧公辭帝鄉白雲為越嶺時雨六條絃布百城震肅人  
既安年既豐羽扇空搖鈴閣不引盼羣山而獨往興發  
得絕境而素尚心來茲山在焉且謚為隱若夫地因人  
弘山自人顯故有嵒結太素至說稱傳谷闢洪荒及超  
號張我得茲山以隱名彰爾其為狀也左扼郡城之固  
右對招提之剝前虛明而散祝融之火後清泚而壓玄  
武之水外孤峰而競聳中六洞而潛通諒仁智之所樂



信靈仙之所宅登山自西舉趾維左首至於南華峒峒中水長十餘步濶不可踰深莫之測澄為靈泉播為陽江水側平坦可坐數十人自南華峒西轉五十步至夕陽峒峒長數十丈其旁有水與峒終始在水之東高下有石如砥如礪十數人可憩峒窮有大石高可跋及廣不盈尺鑿穴而望復使下尋有潭東去莫究深廣又北轉而東八十步至於石門自石門又東北五十步至北牖峒峒虛渾幽其水潑墨中有巨魚可三四尺鏤鱗鏟

甲朱鬚頰尾人或見者龍以敬之潭之左右怪石萬狀如鳥斯飛如虎斯蹲如衣裳發笥如龍蛇出奔乳竇懸玉石壁流雲潭之南有石室深有便房高有石窓追琢不加清瑩可愛又東南轉山一十步至朝陽峒峒中有水旁浸潭則長可數十步三峒之水周圍相通亂於池入於江水中有石高可三尺其色白其容光圓如薰籠大如巨牀以其水浸於潭側故曰側潭尋側潭之西數十步上有潛洞歷險可至窈窕深邃羽人來暨却上南

壁約六七丈有雙碧石盤懸如半壁容水數升其上尋尺有一白石盆常有水升餘酌之不竭味甘如醴色白疑乳剪以病愈飲以顏駐其側可坐五六人左右石壁皆光滑密緻有如磨礪不碍綿絮却下從峒口北轉路絕越險山屐不通構梯架空得至雲戶戶內博敞容三十人旁透虛明洪纖可鑒有貞石榻勒為碁局對以手談局之左右可以偃仰詠於斯觴於斯賓從徒侶各有攸處出雲戶下視北牖蒙溪如指諸掌戶外有二徑其

一直上至山頂山之最高處也桂江屬望縈紆若帶越  
嶺遐眺點簇如黛寸眸千里周覽一息構亭其上以俟  
登臨是歲孟秋月慶雲見於西方自卯及酉南北極望  
萬狀競變五色相鮮州吏請圖以獻之公允而不阻既  
而亭構因目之為慶雲亭自亭却下至南華峒口又一  
徑西去十餘步至白雀峒郡人有獲白雀來獻者雪毛  
霜羽頰觚紅趾且旌雀瑞因誌峒名峒口狹隘側身稍  
通摩臍夾耳可以方之漸下十餘步其右有立石望之

如人次有石室光滑寬敞人或宴息可容數十從此更下有玄潭其深莫測潭東西崑上有一石樓高低可二三尺自下而望如妝點成樓南有二石相去纔數尺被服如人狀意若就樓而看者玄潭泓澄水色如墨見者神悚方暑生寒乃作閣道架潭瞬息疾過西南透於石穴中石穴路右復有乳垂亦如朝陽峒者視其周圍但微小耳愛其光潤則或逾之峒內有穴通嘉蓮洞初嘉蓮峒開而未得其號會有獻同心蓮者遂紀事而名之

從峒北出六十步西去有峒其深不測中路多白蝙蝠  
飛舞在空中從東有穴棧閣盤迴却透玄潭之北有兩穴  
東穴透明長可數丈人不可過莫能究之西穴出於峒  
口峒內平坦石榻縱橫湯茗在茲笙竽以間有石琴薦  
寘以撫絃聲越金石自峒西去至夕陽出西山復人寰  
六峒之能事畢矣自諸水隱山下池謚曰蒙泉派合成  
流水源有二其一源自夕陽注嘉蓮經白雀歷朝陽旁  
浸北牖出於南華流注積為池其一源自蒙溪溪源在

北牖峒東北里餘出於北山自山南流會於南華峒水  
合而成池池因山麓不資人力高深向背繚繞縈迴五  
六里間方舟蕩漾靡微風鏡清波棹女唱榜人歌羽族  
載依鳬鷺翔泳鱗介是宅魚鼈噉喁野花依叢游絲轉  
空蘋末風清荷底水紅萸者取飢者採與人同利恨斯  
池之不大也招提之南長松夾路陰濃蔽日韻響含秋  
外有連理松異本同幹內有偃蓋松低枝覆空為寺之  
光華作山之粉澤松側有竹黃緣盡岸策杖未窮步履

猶遠北牖峒口有閒田砥平南北十餘步東西稱是可  
以施欄檻為戰酒之場可以構簷楹為更衣之所乃作  
水閣立風廊闢厨戶列便房華而不逾儉而不偏面茲  
池以滉漾對他山之青翠絲竹競藝寶僚滿觴歌聲遏  
雲舞影臨水取樂今日鄉心暫忘客有中席而言曰夫  
時景賞樂四者難備東西南北百年不閒既別而復會  
茲山悵懷而未卜他日請執筆紀大賢獨得之勝并立  
碣垂隱山六峒之由匪曰為文且示來者



疊綵山記

元晦

按圖經山以石丈橫布彩翠相間若疊綵然故以為名  
東至二里許枕壓桂水其西品有石門中有石像故曰  
福庭又門陰構齋雲亭迥在西北曠視天表想望歸途  
北人遊此多軫鄉思會昌三年六月歲功南自曲江上  
極山林四年七月功既

干越山記

桂勝云文多剥落不可讀大都記其  
勦構亭樹與山名干越之故略可見

者裁數  
十字

直渚之北有虛楹釣榭由此三徑各趨所抵左指山隈  
右向之僧舍為寫真堂北鑿山徑由東崖茅齋經栖真  
洞而北史紀云秦并諸侯以百越之地為桂林郡吳遣  
步騭征南克有干越

此後惟有吳都賦字不可讀矣

### 四望山小記

山名四望故亭為銷憂亭之前後綿絡山腹皆徑梁危  
磴由西而北復東上疊綵右崖至福庭石門約三十餘  
步

靈渠記

魚孟威

靈渠乃海陽山水一派也謂之灘水焉舊說秦命史祿  
吞越嶠而首鑿之漢命馬援征徵側而繼疏之乃用導  
三江貫五嶺濟師徒引饋運推俎豆以化猿飲演墳典  
以移缺舌蕃禹貢盪堯化也則所係實大矣年代浸遠  
陡防盡壞江流沮潰渠道遂淺潺潺然不絕如帶以至  
舳艫經過皆同梟盪雖篙工楫師駢臂而立登眺而已  
何能為焉惟仰索挽肩排以圖寸進或王命急宣軍儲

速赴必徵十數戶乃能濟一艘因使樵蘇不暇採農圃  
不暇耰靡間晝夜必遭罹捕鮮不胥怨冒險遁索矣是  
則古因斯渠以安蠻夸今因斯渠翻勞華夏識者莫不  
痛之寶厯初給事中李公渤鹿車至此備知宿弊重為  
疏引仍增舊蹟以利舟行遂鐫其隄以阨其旁流陡其  
門以級其直注且候泝汧不復稽澀李公真謂有新規  
善養民也然當時主役吏不能協公心尚或雜束篠為  
堰間散木為門不歷多年又聞堙圯於今亦二紀餘焉

桂人復苦已恨終無可奈何矣况近歲以來蠻寇猶梗  
王師未罷或宣諭旁午晦暝不輟或屯戍交遷星火為  
期役夫牽制之勞行者稽留之困又積倍於李公前時  
轉使桂人膚革羸腊指足胼胝且逃且死無所怨訴殆  
十七八年矣咸通九年余自黔南移鎮於此艤棹渠首  
備觀其事試詢左右曰向時何不疏鑿版築而使難阻  
如是邪則有末校劉君素前曰遠事固不可指明近事  
又非不知修渠必去民病然其奈邇來屢以迎送輜軒

供億師旅召募捕卒犒賚征夫帑藏且殫閭井亦蠹故  
無可以興疏鑿版築也余因謂父慈於子孰有子病而  
為家貧不醫救乎是知長吏所當子民也今民塗炭若  
是又何緣帑藏且殫而無暇救之固湏約用公費日積  
乃布召丁壯導擁塞以平民病也因召君素曰若能主  
張乎君素唯唯遂領其事凡用五萬餘工費錢五百三  
千餘萬固不敢侵正賦以竭府庫也不敢役窮人以傷  
和氣也皆拓求羨財標示善價以傭願者自九年九月

興工至十年十月告畢其鑄隄悉用巨石堆積延至四十里竊禁其雜束篠也其陡門悉用堅木排豎增至十八重竊禁其間散材也濬決磧礫控引汪洋防阨既定渠遂沟湧雖百斛大舸一夫可涉由是科徭頓息來往無滯不使復有胥怨者噫草木無情也榮落限於春秋然猶春則華秋則實以利於人焉而人稱萬物之靈擅百歲之壽安可不以利於人哉況予無大勲業而且據寵祿尤宜孜孜力補尸素豈令草木反鄙於予哉是以

聞害必削見善必樹蓋為此爾時上聞其役遠降詔書  
猥賜嘉獎蓋人臣受國恩為惡則罪耳為善乃常事亦  
猶子孝於親詎可誇乎況余所為未增丘山一塊矣又  
何敢當詔書之美也余所記重修又非為名且要叙民  
之艱苦實由斯渠興後之居者不闕其修行者不毀其  
修長利民而已矣

重修靈渠記

宋李師中

嘉祐三年詔置都水監明年以諸道提點刑獄兼領河



渠事既被命圖所以稱明詔按廣西湖南舊阻嶺弗接  
秦史祿導海陽山水逆為石磯以激水分嶺而下會湘  
桂二水合為一北通京師南入於海厥功弗究石亘數  
十里不絕自秦迄今千餘年強民力為隄為陡門以制  
水於石上水漸而至號曰渠是渠也寢以堙廢公私患  
之至是定計以聞遂發遣縣夫千四百人授張競日往  
營之動而免險功斯濟矣競與石懷玉孫約等親率其  
徒燎石以攻既導既闢作三十四日乃成廢陡門三十

六舟楫以通李師中馬仲芳實領其事於乎唯至誠能  
通萬物之阻古之君子德行常簡易行有尚往有功者  
其心亨興渠之利不足云朝廷稽古建官為萬萬世計  
推此以觀天下六府三事庶乎可治也已故敢書以告  
來者

曾公巖記

劉 誼

元豐元年冬交人入貢上方擇人處置疆事乃詔曾公  
自廣州移帥桂府二年南方無事民和歲豐公以其餘

暇訪尋桂之山水奇勝處一日率羣僚遊所謂風洞者  
縱步而東行得一崑於榛莽間崑之前有石為之門曲  
屈而入則流水橫其中碧乳垂其上周環四視其狀如  
雕鏤刻鏤殆出於鬼工而不類於融結者也公於是拂  
石求前人之迹則未嘗有至者焉乃構長橋跨中流而  
渡以為遊觀宴休之處且與衆共樂之自是州人士女  
與夫四方之人無日而不來其崑遂為桂林絕觀夫桂  
之洞穴最多南有白龍北有石門迴穴據其東隱山在

其西皆唐名流之所嘗遊也觀其詠歌序刻莫不極道其勝概而歎前人之所遺者斯崑之景亦冠絕矣而乃獨遺之是真可歎也已豈得時忽於尋訪而不見邪將唐人所謂天作而地設之必待我子而後顯邪余生長東吳號為山水窟中如天台鴈蕩最為奇觀然未有過此者也邦人樂公之德政而願以曾公名其崑以比甘棠之思余故為書之且以告後人收入為圖經盛事云公名布字子宣

開清秀巖小記

唐鐸

桂林多勝致其廢於榛棘者十八九斯洞以遠尤不獲  
葺呂公一賞居民爭出力以新之樓閣巋然不日而就  
幽竒雋發應接不暇驟改觀於游人殆非偶然之遇也  
靖康改元七月朔臨桂令唐鐸謹題

勾漏山寶圭洞天十洞記并序

吳元美

天下洞凡三十有六容南西及鬼門關內一郡而得三  
焉南都嶠北白石西勾漏西山之南去郡一舍而近古

銅州也平川中石峰千百皆矗立特起周圍三十里其  
崑穴多勾曲穿漏故以是名予足迹半天下所聞名山  
多矣卓絕雄傑鮮或儷此者愛而不可失列為十圖置  
諸座右朝夕自其外而想其內外所見者毫楮可及然  
特彷彿一二耳若三洞中所有須至者自知譬如乾坤  
容日月之光安可繪畫也

寶圭洞記

繇觀後西北行二百步如倚屏門闢衆魏榜其上曰勾

漏洞天正寶圭洞此葛仙翁修煉所也洞前小亭俯瞰橫塘倚欄四顧則列峰回環如衆星之拱北辰其魁磊而秀偉者稷契皋夔冠弁圭璋以侍堯舜其挺特雄毅者韓彭吳鄧戈矛劍戟之衛高光也石室中有玉宸道君及葛真人石像石室之東為寶圭洞雄偉壯觀秉燭而入有丹竈牀几盤甕碾臼皆石乳自然凝結而成竒怪萬狀神摹鬼刻非人間所有約半里水涯循梯直下擎竹筏以行歷甕門三四重間關委蛇燭盡而回翌日

棹小舟再往乃窮水際益廣益奇波光澄明蒸靄溫燠  
嚴冬如三四月時同遊者驚駭以為神龍窟中不可久  
居乃歸中流矯首見一點烟如長虹出天表蓋石罅之  
容光也捨舟躡梯攀躍而上曲磴飛棧妝點如瑤階雲  
徑小石羅列如瓊杯玉笋瑣碎如楊梅荔枝充實其內  
不可名狀轉左側身而入直穿太陰洞後山半而出蓋  
寶圭之東掖也其中室曰蟠桃深三四百步仰視高處  
杳不見頂然蟠桃之名圖經不載他無所考據其西小



室洞明外達連榻周遍可踞可臥蓋寶圭之西掖也鄉  
予嘗遊都嶠怪其山奇秀崑穴在下其色黑青而多膏  
乳每疑二洞其受陰陽之殊近見寺丞王君云凡陽洞  
靈仙所宅陰洞鬼神所居勾漏陰洞也抱朴乃於此修  
煉者蓋寶圭衆峰左右拱揖受陽和之氣水火既濟故  
能成功亦如男子通身皆陽獨尾閭穴屬陰女子通身  
皆陰獨玉泉穴屬陽此造化妙用處葛君深知之予謂  
其語頗有理遂記於此以俟識者

白沙洞記

予平生俗眼未嘗觀寶圭之勝以為天下極美而客有  
言曰白沙其尤美乎予聞喜而不寐黎明杖屨崎嶇亂  
石間秉燭從竇入俯偃扶伏凡經六七竇所過益寬而  
所見益奇行里餘乃至中洞縱廣一頃高數十仞石膏  
玉英散彩流光大者齊雄堞小者雜毫芒奎壁交加星  
宿焜煌愈於寶圭不可為量數仰睇之如崩雲如飛幢  
如棟梁如榱桷俯盼之如驚湍如怒濤如畦畎如丘阿

如鼎俎如籩豆祝敵笙竽之為禮樂器者如弧矢刀劍  
戈矛甲冑之為兵戎具者如杵臼犂軸餅罌甕盎為農  
庶家所費用者如塔像臺案幢幡鐘磬為僧道居所嚴  
設者如齊縞吳紵霜縑霧縠其文彩鋪張於拖架如趙  
璧楚璞圓環方珎其雕琢堆疊於府藏其朴如蕢桴土  
鼓其奇怪如神鬼形狀千巔萬壑不可殫盡或者擊之  
則鏘然如洪鐘轟然如震雷厲然如長風吼衆籟泠然  
如飛瀑瀉谷令人神思飛揚形容不逮但索筆書曰勾

漏甲於天下而此洞為勾漏第一既而俯視其下有洞  
井數十皆舊時採砂處凡砂生於此獨白蓋坎離之交  
自然變化非若鉛石有假人力也予俯拾之得數塊如  
粉道人云春水滿谷而砂始凝採者宿火其傍候凝白  
光漾乃可取間或得之亦不常有近聞有好事者以厚  
賞募少年乘懸索而入下方至地聞霹靂聲若數千牛  
吼然少年驚仆久之乃蘇以為遊觀者之戒自旦達午  
予遲留不能去從者告饑乃側身由小竇出行數步豁

然見天其旁羅周遍怪怪奇奇間架邃延幃幄參差下  
闕齋房上聳觀閣玉精蕩射星斗錯落出門回顧則飛  
簷峻宇嵯峨峻坂若過清都閭闔之下前視峰巒拱對  
列侍翕然一都會也始客導予入曰洞當從後門出蓋  
古來謂此為後門至是予大笑曰何倒置也凡居其間  
有正堂在其中列舍挹其後今此門高數百尺與五鳳  
樓相似麗譙翼然內外朗然自庭徂堂高廣數丈如之  
何其後之也遂令置棧磨崖將求善書者大其題曰白

沙之門

韜真觀記

出白沙洞門而西左右皆小峰相對山北平時孤烟落  
照茅茨篁竹間始有人居曰道村其東南諸峰間見層  
出寒松古槭蓊鬱香靄有洞掩映其間曰韜真觀中有  
石碣記南漢時中官陳君所經營及今近二百年醺壇  
道院故址盡沒榛莽中道無不可行予至亟令火而焚  
之課僕從葺茅齋一間為食息處修治掃除鳴鐘鼓琴

香火已覺洞前山川改觀矣左右二石室其深四五尋  
石牀相對大冬亦溫疑下積硫黃氣而然其一狹而長  
捫壁度穴直抵玉虛洞後山而出約不啻里餘也觀之  
上重重如層樓複閣其下溪澗映帶如長虹巨蟒其外  
亂石崖立絕如家人假山有靡麗如羅縠者有雕鏤如  
珠帶者有明潔如金玉有連漪如淵波者其各體異狀  
亦多怪也讀其碣云崑洞多嵌空或深數尺遂積土以  
實之予陋之曰大為洞小為穴凡石以嵌空為奇政欲

空所有安可實所無哉今仰觀者如綺疏藻井旁通者如甕牖圭竇凹者如圈如臼凸者如簷如蓋陰陽闔闢呀天穴地豈不奇哉乃實而夷之使吾不獲見造化之全巧顧不惜哉茅齋之右有石窟高深丈餘古木垂蓋藤蘿圍繞予終日坐臥其中遂私其言曰茲觀當勾漏之中旁鄰玉虛面揖玉田東望寶圭三里抵普照崑前抵獨秀崑漁歌樵吹雞犬相聞吾儕得三四人從者五六人相與耕田鑿井暇則往來徜徉其間或有葛翁之



來祕方刀圭可幸而親也因問村氓曰道人有居此者  
乎村氓曰一老黃冠隸名茲觀久矣然去此四十里而  
家歲或一來來未嘗留宿予感額曰有志於此者何憚  
遠而不來而有此佳境迷不肯住世間凡骨何其滔滔  
邪

玉虛洞記

予寓韜真洞與道村老農周遊遍覽酷愛東南羣峰傑  
出烟林之表丹楓翠嶂與洞穴相間晴嵐霧靄變態無

窮繚繞如城郭羅列如屏幢堆疊如困倉馳驅如車馬  
上而高室者下而突竈者浮圖而合其尖者大圭而挫  
其首者如指日之戈如倚天之劍如囊脫之錐如垂雲  
之翼如承露之掌如威象之齒如芒星之光如堂階之  
設簾業列羽如壇壝之為俎簋尊登競巧效奇譎怪百  
出雖公輸之巧不能琢削雖龍衍之辨不能形容也每  
疑其下韜虛孕秀各有洞府但不能得其門入耳村叟  
陳訪者頗通曉識時人語言予始叩之不肯吐久乃曰

此豈無有但父老戒我勿以告人耳詢其故則曰官客  
來遊吏卒有追呼之擾若繕橋道備薪火尚有可為其  
需物品備食飲何其甚也驅逐捶詈雖雞犬不得寧顧  
何益於我哉予聞其語而然之止不復詰他日復來勞  
以酒笑指觀旁一峰曰此念經窟也舊有淨行諷誦於  
其石相去跬步能可登乎予從之捫蘿而上由空穴數  
重至其腰有崑深廣二丈可坐外瞰東野如觀畫圖循  
緣攀躋如旋羚羊之角如披蝸牛之殼久之直徹峰頂

而出凭高遐矚去天尺五令人有飄然凌雲冷然御風之態旣而復指其下曰此觀衝洞也復隨之從穴而入其峰勢支分派別開拓旁午紆餘屈曲如列衆柱而成室屋南北東西路脉交通火光四燭洞煥太虛俯者仰者蟠者飛者走者倚者負者皆瑩如玉爛如銀也有潭碧色或云每枯旱時雲氣中蒸上徹霄漢如薰爐如炊甑雨必立至雨止則回風颯然橐籥而入蓋龍之升降也予謂此峰上摩天輪下控地軸其中洞然凝結如玉

色而名曰念經窟觀衝洞皆不雅輒更其名為玉虛洞云

巫山寨記

玉虛洞之坤維得馮道士石寨而望之天地設險隱然鐵甕城也其巋然當前者排敵也洞然旁達者睥睨也巖然下瞰者邏戍也峩然上聳者烽臺也拂雲而鉅者者牙纛也射日而森布者干櫓也屹立而齊整者守卒也踞坐而揮領者主帥也行將逮門則橫屋駢羅曲磴

周遭萬兵叩關一夫誰何風松鳴杵烟蘿張幕蛇行雀  
步乃至北落入其中規圍二頃絕壁千仞十有二峰四  
顧一圍接郭連郭前植樓觀後峙香爐左拱而竦右倚  
而趨其色紫翠間以尖峰懸崖卓犖連蔓巒岿怪奇可  
駭可愕踵挿重泉頂摩九天接武差肩揖遜相先信乎  
瞻在前忽在後仰彌高鑽彌堅也予拱手而還曰此寨  
之景得非吳許十二神仙宴座壺中日月長處乎不然  
則妙嚴圓梵大士同如來光明藏也遂規地雜草列石

環坐且仰而歎曰彼馮道士者何人乃托名於此而易名之為巫山寨其何如哉

玉田洞記

玉田洞在韜真觀之西巫山寨之北其界相望也洞闢三門其高者險絕難攀其卑者偏塞難行獨由中而入路分三歧右則坎阻杳黑左則虛明朗快受明之所則洞門高處也庭中廣深如在觀閣之下其盤石皆翠碧色平夷通明可以偃仰其膏乳則玉石流光悉具物象

緣石棧行百步傾身而入乃至石田其田數坵廣有二丈長三倍之中且平其塍畔皆勻續蜿蜒刻鏤精緻如今人食用器皿所為其傍有花瓣寸餘純然玉色亦如今人器皿日用銅銀為飾造化巧妙瑣屑遂至於此安可以描模億度也田中積水無間夏冬不溢不涸不增不減氣常溫而蓋萬乳所融洩耳越疆而東其竅多鍾乳垂而四五寸者光采矚然時可採取舊曰石田予謂石田何所用之此正仙人種玉處遂更名曰玉田洞出



洞而南半里至玉田寨寨高至十餘仞其坳中瀦蓄湛然如按藍潑黛厲風不動搖廣四五丈深莫測也篠蘿陰翳怪石蹲踞如神守鬼護其北流為二池中有小島嶼狀其南則潛流北出溢入大江春時江中大魚逆躍入此似有知也自玉虛洞至此皆毗陳訪所導疑訪尚有隱秘處然遊觀止矣雖有他奇吾不敢請已其土人好事者亦來往山間三十年未嘗有至此者然予觀覺之勝其鑿空固自我發之異時車馬踵至晨夜囂呼擾

及田桑則作俑之罪將何逭之既而自覺曰嗟乎簞食  
瓢飲芒鞋布襪曳短筇探餓虎之穴與猿獠為伍世間  
嗜好如我者寧有幾而誰肯為此來乎

普照巖記

普照巖距韜真觀五里山如覆釜洞穴當其胃唐時有  
草亭於上蕪沒久矣或以洞中之奇來諭遽到其麓從  
者厭登涉剪雜荆榛雜然因以免窟見欺予曰第焚吾  
先登既至崑下舊址巋然回首却顧則西望東臯南北

阡陌盡在足下黃坡翠巘與石峰相間歷歷落落尤可  
觀也入間數步上通若中雷狀古木覆之屏几之右有  
玉猊立於旁堂之中簾幕高張筵几肆列仰視則如玉  
京山紫虛府鬱秀不可階升也俯瞰室內恍敞森嚴詭  
怪絕特令人毛髮颯然與月夜扁舟於千崖萬壑風烈  
水寒無異其中仙壇臺塔低昂交錯靈幡寶幢霓裳羽  
衣皆獵獵飛動如龍夭矯如鰲顛顛如龜折甲如麟有  
趾以火燭之鱗甲耀目以物擊之聲響駭耳旁睇壁間

則蟲篆瑣碎奎壁成文綠質白章駢花鬩錦穠粗疎密各有態度不知雕琢之奇繪繡之工果誰為之當安僧迦於巖以實其名以傳不朽可也

獨秀巖記

度普照嵒之西長坡巨阪川原遐曠石山到此稀矣遠矚平野中鬱然孤峙者獨秀嵒也予初望如廩狀意頗隘之既至則洞門宏邃古木蕭森與韜真觀抗衡石室中廣六丈高倍之虛明平夷可容千數人石乳挂壁上

如彌陀大士像此又韜真所無者徐升其巔徘徊倚望  
四顧豁然前雖小室附庸亦足觀者此蓋勾漏別峰也  
車馬往來距邑十里雲山蒼莽西入鬱平松灣竹塢樵  
牧出沒此異人居止處倘在中州堂上列鐘鼓門外來  
名士可時刻已乎然遊遨寶圭獨秀姓名歲月題刻宛  
然記此奇勝何忽略邪豈以遷謫之故日懷惴惴憚於  
來遠邪將駐旌倚馬匆匆去來未暇徧歷邪殆亦有記  
之而斷碑漫版荒陋中無好事者為之流傳愛護邪予

方來假道過此不敢賦詩姑為倡曰遠投鬼門關徧歷  
仙世界豈敢問丹砂庶欲銷墨礙此乃寫興而不已者  
也

### 金龜山記

圖經俗名為真武嶺高八十丈在邑東二里山色蒼蒼  
黃黃其背穹窿坡陀肆垂首戴巨石高十餘仞峯嶽突  
出間色青黑且有口吻狀四圍遠近視之如真靈龜也  
天下峰巒嵒谷若龍若馬若獅子之像多矣然彷彿而

得四五獨此粹然逼真顧不異哉水流大江直西南來  
龜從東北舉首而赴之或云隔岸有山曰會靈相對而  
起此上有壇而彼土有臺予未能至不知狀貌何如也  
是山最與勾漏為鄰而龜闔然於洞前故附於圖之末

張公洞記

張維

環桂之北嵒洞二十有四皆人迹所至者獨佛嵒之下  
有峒焉虛明而邃幽過之者弗顧豈遊人慕佛嵒而來  
窮其足力興盡則汲汲而去雖欲一顧有所不暇邪抑

視之如苦李以為不足嗜邪乾道元年予承乏按刑嘗  
同張使君紫微公幽尋得之相語曰斯洞蔽於昔今自  
吾人始發盍立亭於峒之前俾來遊者指為張公洞可  
乎明年使君去予實繼之又明年治中從事因人心之  
去思也於是大書以表之

開潛洞記

乾道四年春正月浚西湖秋七月開潛洞明年春二月  
疏鑿李蹊二百六十步有畸可通畫鷁而洞山宛在水



中矣疏鑿之力汲郡袁進平原聶倫東明石良弼競率所部不日成之延平張維識於洞濱之石同里曹總書

西湖記

鮑同

桂林西湖今經略使徽猷張公所復也舊日蒙溪去城里許而近勝概為一郡甲按唐吳武陵隱山記韋宗卿六洞記皆述溪潭可以方泳然歲久廢為田尚可考者特一潭二池有芰荷廣不踰尋丈餘盡耕稼之壠矣初公游山中得二記按之以求後讀吳記至走方舟泛畫

鷗渺然有江湖趣則歎曰鬱茲觀美可謂殺風景者矣  
遂已默記厥由居山之麓衆泉所會中偃而四穹茲蓋  
天成第流泉使之不得去則湖可坐而復乃相所從池  
作斗門以閘之未幾水遂盈衍澶漫若潭若池橫徑將  
數十畝望之蒼茫皎激千峰影落霽色秋清景物輝煌  
轉盼若新然吳記以為溪而云作亭牖北夾溪潭之間  
韋記以為池而云北牖洞口有田砥平可施欄檻以知  
昔時猶有淺陸水所不及之處而今洪深之漚矣其中

流平沙隆出波面如島嶼因築亭其上命之曰瀛洲植  
卉藝竹映帶遠近南閘招提西隱山為亭每遊覽則憶  
家山因命之曰懷歸北依茂林俯流為閣用老杜湖水  
林風之句命之曰湘清放船集賢於是乎在環山循趾  
引水疏渠繚繞縈迴索奇討幽得新洞二命曰北潛南  
潛又為亭於其陽直西命之曰望崑是皆出乎六洞之  
外發前人之遺逸增往牒之未載遂使西湖勝概翛然  
如立塵寰之表江浙所稱亦未能遠過焉

遊南中巖洞記

羅大經

桂林石山怪偉東南所無韓退之謂山如碧玉簪柳子厚謂拔地峭起林立四野黃魯直謂平地蒼玉忽崢嶸近時劉叔治云環城五里皆奇石疑是虛無海上山皆極其形容然此特言石山耳於暗洞之瑰怪尤不可具道相傳與九疑相通范石湖嘗游焉燭盡而反余嘗隨趙季仁遊其間列炬數百隨以鼓吹市人從之者以千計已而入申而出入自曾公岵出於棲霞洞入若深夜

出乃白晝恍如隔宿異世季仁索余賦詩紀之其略曰  
瑰竒恣搜討貝闕青瑤房方隘疑永巷俄敞如華堂玉  
橋巧橫溪瓊戶正當窓仙佛肖彷彿鐘鼓鏗撞鼙鼙  
左顧龜狺狺欲吠厖丹竈儼亡恙芝田藹生香搏噬千  
怪聚絢爛五色光更無一塵浣但覺六月涼玲瓏穿數  
路屈曲通三湘神鬼妙剌刺乾坤真混茫入如深夜暗  
出乃皦日光隔世疑恍惚異境難揣量然終不能盡形  
容也又嘗遊容州勾漏洞天四面石山圍繞中平野數

里洞在平地不煩登陟外略畝豁中一暗溪穿入因同  
北流令結小桴秉燭坐其上命篙師撐入詰屈而行水  
清無底兩岸石如虎豹獠獍森然欲搏行一里許仰見  
一大星炯然細視乃石穿一孔透天光若星也溪不可  
窮乃返洞對面高崖上夏間望見荷葉田田然峻絕不  
可到土人云或見荷花則歲必大熟

湘水記

吳曾

朱蘋曰予以湘之維錡及釜說者曰湘烹也韓退之盤

谷歌曰盤之泉可濯可湘蓋水之清潔可滌可烹者也  
按酈道元水經湘水出零陵始安縣海陽山注海陽陽  
朔也應邵曰湘水在零陵縣北故縣零陵之南部孫皓  
曰甘露元年立始安郡湘離同源分為二水南北南則  
離水北則湘水而東北流焉羅含湘中記曰湘水之出  
於陽朔下流至於洞庭日月若出入其中自今觀之靜  
江之水非自陽朔以抵全州其源流大小可以考見不  
誣而國朝李宗諤所修圖經以湘水源自桂州興安縣

伏波渠口分流東流至州一百六十里誤矣故凡稱湘之山水今皆不在境內水自陽朔山自縣北爾零陵郡自漢武始而縣名洮陽隋名湘源至晉天福四年馬氏改為清湘杜子美詩嶠翠清湘石疑其所自云唐戴叔倫詩瀟水連湘水千波萬浪中知君未得去慚愧石尤風

韶音洞記

張 栻

由虞祠之後不十步至虞山之下有石門可窺入其中



則虛明以長仰而視之石去人僅尺許色清潤可愛瞰其旁蹲踞蜿蜒如虎豹龍蛇者皆是也行其中十餘步望北牖清江橫於前下臨深淵所謂皇澤灣也始忾既新帝之祠得新安朱熹為之記命工人度山之崖磨而鑄之偶發石而得斯洞鑿其下石之齧足者剪其北林薄之翳目者而地之勝有若天成焉名之曰韶音洞蓋淳熙三年秋也洞之深凡十有三丈廣二丈有奇牖之外少西有地隆然而高為臺可釣明年秋又於洞之左

得小丘平曠爽塏江出於旁凡桂之山瑰奇傑出者悉  
獻其狀作亭於上名之曰南薰之亭於是祠之前後皆  
有覽觀之美來拜祠下者已事而退又得以從容而游  
息焉嗟乎有虞氏之德其盛茂以加矣蓋君臣父子兄  
弟夫婦之彛性孰不具是哉帝之所以為盛德亦盡吾  
心之所同然者爾是則帝之澤流洽於人心固將與天  
命並行而不可泯夫何有古今之間哉後人徘徊於斯  
地遐想簫韶之音詠歌南風之詩歌舞而忘歸也其亦

庶幾有以興起乎遂書於石

柳山記

林 岳

登書堂西山其高去平地六七十丈許望三江東北流  
岡巒回複渺不見蹤迹忽獻波光照人心目約百餘尺  
許名其臺曰寸月而將為之記臺方就予以守滿浮湘  
至瀟湘合流處連值風雨陰雲迷冥未覩所謂月也舟  
泊梧溪三更登元水部堂亭時孟冬望後六日月半璧  
羨三二分許瑞光出於林表坐客停盃皓影散於波心

歸舟列炬同遊僅二十人許下水上天月行其間水月  
之光滉漾太虛水澄之光妝嚴色界雖未到洞庭君山  
而有洞庭君山之勝象雖未抵蜀江嘉陵而有蜀江嘉  
陵之景趣廣陵八月之濤黃河千年之清碧海三神山  
島飄飄焉可以意遇也因思寸月臺別去甫旬茲余適  
斯時登斯臺不知山中何人亦以斯時登斯臺邪讀書  
夜半仰觀星宿者古有之矣噫何必夜半江光四時皆  
月也昔人詠未望之月曰龍爪曰玉鉤曰開鏡曰磨鎌

詠既望之月曰金釧曰半輪曰金樞曰寸銀各以所見也余取寸月比書屋西望之江流適興命意云爾後之覽者當有賞於予心是為記

修朝宗渠記

方信孺

嘉定

闕年

月提舉河渠公務方信孺修復古渠築渠

開二石堰一靈溪之水大至略城而西達於陽江董事者昭州立山縣尉丁似雄邊軍統轄孫恢迄工六旬糜費萬錢因採范石湖詩以朝宗名且志於石嘉平月日

程公巖記

侯彭老

自湘南樓渡重江而東林垌曠然距水五里有山如屏  
儼然高峙若環羣峰而主之其中卷然虛廣而邃深幽  
巖天成仙居神護凡數百步貫徹山之陰高明爽塏下  
視七星山若導於前西顧洲渚城邑可以指數蓋龍隱  
棲霞之所蘊蓄與夫轉魁傲雲之所鋪寫是皆兼而有  
之備具衆美冠於天南雖使造物者更復運意不可增  
損崇寧之初鄱陽寶文程公始開是嵒方是時桂人樂

公之化而從公之遊蓋無日不熙然也咸以程公巖名  
之遺愛在人百年之思景物如昔言者墮淚後數年公  
之子繼來帥桂其忠義文武所以為國家扞邊而庇其  
民者一如公而年尚壯力方剛福祿功名未易量也公  
之盛德可信者如此則是崑托公以久者當與召茆同  
日而語又非特若羊公之峴山而已昔柳子厚為裴中  
丞記訾家洲其辭瑰怪然徒列遊觀之勝而是崑也余  
可以無藉乎

隴壕二陂水利記

林仲賢

壅水以激碾磴其利小浚水以灌田畝其利大自夫梏  
於已見不知利有大小而至於爭詞訟紛起州縣拘率  
予決莫定郡運都祕換顏大卿先生一覽民詞權衡輕  
重立談而判至誠感動爭心自弭於是帖官毀除水碓  
就大田畝令田兩開濬水圳深濶各二尺五寸通泄江  
流邇迤下灌富多堡三十餘頃田此其利大矣百姓歌  
舞鞭石樹碑以識歲月庸示久遠不忘之意



劉仙巖記

元潘仁

桂林諸山奇秀為嶺南最皆平地拔起望之亭亭玉立或森若劒戟而嵒穴幽邃冥搜莫極至雕鏤萬狀窮極天巧雖繪事不能彷彿其最近可朝夕遊者則有若七星嵒水月洞惟劉仙白龍二嵒尤號奇觀然去城踰十里許遊者數至憲使濟南宋公紹明按節廣右越仲夏初吉時雨新霽嵐氣廓清相與同集嵒下屏徒御攀危磴瞰幽穴摩挲石刻以訪劉仙之遺蹤踵昔賢之芳躅

聳目曠漠之野而憐茲耕稼之民俯仰今古悵然興懷  
歸過白雲洞仰觀絕壁巔崖神爽飛越是日樂甚命侍  
吏潘仁記之



粵西文載卷十九